

Juta

Juta okusiwa maekwerà

Imovyvya

Aã kareta Janejare'e 'Āg omotekokuwa Juta tokusiwa pirujẽ Jesu koty rewarà kō pè maekwerà. Kee jaa okusiwa: “Tapejimomãatã jẽ ikõ Jesu rè peiko poromoripe mãe kō rovake ipi nẽ. Iwaria mãe kō pè tapejimoripeoka e'ã”, ejaa okusiwa (Jut. 1.3). Juta kee e'i ikusiwa ayvu ikatuay wete mã'ẽ rè: “Tapejimokasiay ikõ Jesu Kiristu rè pejirovija jẽ nẽ”, e'i. “Aje ywete ijayvu e'i ipi. Temirovija tè ijayvu...Kãramõ Janerõvijã Jesu Kiristu janereraatã okoty, opyri tijaiko karuaru rômõ ky'y. Janeporijauesa wyi tè a'evotã janerereko ãmẽ. A'evoa rã rè tapeja'a jẽ imoa'u pekupa”, e'i ikusiwa ijupe kō (Jut. 1.20-21).

¹Ije Juta, Tiaku^a mõmirĩ. Jesu Kiristu remĩgwai tè ije. Aã kareta akusiwa peupewarà mō ajupa. Janejare'e pepyteporo mãe kō rômõ peiko. Penauvay Janejare'e penereko ipi. Jesu Kiristu oja'a katu pene ipi.

²Janejare'e ikõ tapeporijauesa ipi nẽ. Tapepy'amopiryvypy katu ikõ ipi nẽ. Tapejiauvay ikõ ojipyri peiko remẽ nẽ. Age'e remẽ ywesõ ta'evo peiko ky'y.

**“Tapejimoripeoka e'ã Janejare'e ayvu rè poromo'e rã'ãga mãe kō pè”, e'i mã'ẽ
(2 Peturu 2.1-22)**

³Ejimorypa katu kō. Apota katuay kareta akusiwa peupe mijã. Janejare'e janerereko katu okoty rewarà kō rômõ mã'ẽ rè akusiwatã pejẽ mijã. Āmõ tè akusiwatã ky'y ajamã'ẽ. Age'e kee a'e pejẽ. Tapejimomãatã jẽ ikõ Jesu rè peiko poromoripe mãe kō rovake nẽ, a'e pejẽ. Iwaria kō pè tapejimoripeoka e'ã, a'e pejẽ. ⁴Akuwapa Janejare'e nomomojyi mãe kō mō oikopa sikaepo pepytery pè iko. Ajimonyi aepo aenu remẽ ajimopirai. A'e kō, “Pevoarã kō tè ore”, e'i epe peupe kupa ipi. Janevoarã kō rōwã

^a 1.1 Jesu mõmirĩ kō Juta Tiaku reve, Maria memyry kō rômõ. A'e Tiaku, Jesu koty rewarà kō rōvijã rômõ ekoi, Jerusarẽ taa pè. Emogeta Mat. 13.55; Mak. 6.3; J.K.R. 15.13; Kar. 1.19

apijarerà ajamã'ê. Janejare'e ayvu rupi katu rōwã ekoi kupa ipi. Ijayvu omotee kupa ipi. Kee e'i tite kupa: "Janejare'e poroereko katu okatuaya rupi ipi. Ajawyi nivoi jaiko remê, nimanyvoi. Janerau jê ipi. Ajawyi a'evo jaiko ipe remê, nijanemomori'au'ãi", e'i ywe'e tite kupa ipi. Ajawyi ojimoane'e jê waiwererà rupi iko kupa ipi. "Erōvijã" ne'i teve Jesu Kiristu pè kupa, ãwisō a'e rōmō'ite Janerōvijã ywete rōmō ekoi remê. Ajawyi Janejare'e omomori'ajautà apijarerà.

⁵ Pekuwapa Janejare'e omomori'ajau nivoi mõe kō ipi. Poromoja'aoka jêtà a'evoa rē [eremikusiwarerà rupi] ajamã'ê, karamoe remēwarà rē tapeja'a ipi. Janerōvijã ywete itōkō wereko katu ipe Isaeu kō karamoe remê mijã, Ejitu yvy pè ojimomori'ajau kupa remê.^b Tōvijã ai kō po pe wyi itōkō wekyioka kō ipe erojivy. Ajamã'ê a'evo paire ijatyry kō noenui ijayvu ky'y. "Aje" ne'i ijayvu pè kupa. Ajawyi itōkō Janejare'e omomori'ajau noerovija tari mõe kō imoma kō ky'y. [Aekwerà rē tapeja'a jê, a'e pejê.]

⁶ ãwivo ve karamoe remê itōkō Janejare'e remigwai yvapewarà kō mō ojimoãpã ywe'e tite Janejare'e rē. A'e kō werovija katu oōvijã mijã. Ajaire noerovijai ywe'e tite kupa ky'y. "Jane, janeayvukasi teãmã", e'i ywe'e tite ojiupe kupa. Wena oity ywe'e tite ãmê kupa ky'y. Ajawyi Janejare'e omonooka kō pãtōnusu pupe toiko kupa. A'e tena vaiwerà pupe omopã'ãoka kō. A'e pè oiko puku jê iko kupa. Kãramō Janejare'e poromoe'yi remê, wemavo kōtà ity oo ky'y. [Aekwerà rē tapeja'a ja'a jê pejimotekokuwaa mō, a'e pejê.]

⁷ A'evo ve itōkō Sotoma taa wãnà kō nivoi ekoi karamoe remê.^c Komora taa wãnà kō teve nivoi ekoi. ãmō taa miti kō wãnà kō ve, Sotoma taa pyri'ije'ê sa'u wãnà kō ve. A'e a'e wãnà kō pirujê nivoi 'ete ekoi kupa. Nojimoavai mõe kō tē kupa ipi. Ojimomy'a my'a ojee kupa ipi. Poromosioka jê tesō kupa, jamã'ê ee kō remê. Ajamã'ê a'e kō nojimosioka'ãi kupa, a'evo ekoi kupa remê. Ajawyi tesō itōkō Janejare'e tata wasu noe'ãi mã'ê oinōoka ena kō revejê tokaipa kupa. Ajawyi aekwerà rē tija'ja'a jê jajimotekokuwa ipi, eruparà kō rōmō tijaiko e'ã.

⁸ A'evo 'evo maekwerà rē pepytery pewarà kō noja'ai ipi, nivoi mõe kō rōmō. Ojimoane'e jê tesō waiwererà rē iko kupa. Nojimoavai tesō kupa. Kee e'i kupa: "Epouvaiawerà rupi akuwa nimanyvoi a'evo aiko remê", e'i ywe'e tite oupe kupa. Ojimokasi ywe'e tite teve Janejare'e rovake kupa ipi. Janejare'e remigwai yvapewarà kō tē tesō werōarō kupa ipi. Wãisō ekoi kupa.

⁹ Janejare'e remigwai yvapewarà kō rōvijã Mikeu eu ijupe mã'ê ipe nomojaiwei ãjãgai rōvijã. Kōitokō karamoe remê tãmō Moisesi okãjã

^b 1.5 Jisyry. 12.51; P.Moirō. 14.29-30 ^c 1.7 Karamoe remê Janejare'e omoma Sotoma wãnà kō tata wasu pè jimo'yjê, ijaiwererà kō rewarà mō. Komora wãnà kō teve a'evo wereko. Jinō. 19.1-24; Mat. 10.15; 11.24

remē, ājāgai rōvijā opota ipe tāmō Moisesi reāgwerà reraa oupe mijā. A'evoa rē ojiaiyvuvaja vaja kupa. “Neupewarà rōwā āwī!” e'i kōrijō Mikeu ijupe. “Erōvijā ywete tē ikō taneaka nemomorijau nē”, e'i kōrijō ijupe. Nojimokasi ājāgai rōvijā mojaiwe ajamā'ē.^d 10 Aā kwaima'e kō āmē ojimokasi ywe'e tite kupa, pepytery pē ekoi mēe kō. Wemikuwa e'ā rē oporegeta ai ywe'e tite kupa ipi. Oojai ywe'e tite kupa ipi. “Ije ywesō akuwa!” e'i tite kupa ipi. Tekokuwaa rupi rōwā ekoi ywe'e tite kupa ajamā'ē. Wemimotarà rupi teāmā kōrijō ekoi ywe'e tite kupa ipi. Āwitō mijarà wemimotarà rupi tepe'yte oo oo ipi, a'evō 'ejē ekoi kupa ipi. [Ajawyi ywesō Janejare'e omomorijau kōtā.]

¹¹ Mokoi ekoi kupa! Aje ywete Janejare'e omomorijau kō ywetetā kāramō. Karamoe remēwarà kō reruparà mō ekoi kupa. Ma'e. Kāi reruparà mō ekoi kupa.^e Āmō, Paraā reruparà mō teve ekoi kupa.^f Karakuri pyya rē ywesō oja'a mēe tē Paraā. Ajawyi nivoi ekoi ipyyarà rōmō ky'y. Āmō, Kore reruparà mō teve ekoi kupa. Oōvijā rē ojimoāpā mēe tē itōkō Kore.^g A'e a'e kō reruparà mō age'e remēwarà kō ekoi.

¹² Kee ekoi kupa pepytery pē. Pejimoaty pejimory pejimiwa remē, ojimoaty rā'āga peneve ojimiwa kupa.^h Pemoākwa'ā tē kupa. Oka'u kōrijō tē kupa ipi. Nosī kupa ipi, wekoa rē. Ajawyi ipojoy ai tē sikaepo pepytery pē iko kupa. Āwitō takuru pyy pewarà ipojoy sikaepo janeupe yarā jaraa remē, āwīvo ekoi kupa.

Āmō, āwitō weima kō rē noja'ai ipi mēe kō kupa. Wee kōrijō tē oja'a katu kupa. Āwīvo ve Janejare'e ayvu rē poromo'e rā'āga mēe kō ekoi.

Āmō, kee ekoi kupa. Āwitō vyvutu aje ipe sō yva rātasī weru remē, “Āmānā okytā eremitā kō mory!” ja'e tite remē. Ajaire, soō, nokyi sikaepo āmānā! Okwapa 'a tē yva rātasī. Āwīvo poromo'e rā'āga mēe kō. Teako'i tite ee kō. Nijanemotekokuwa'āi kupa.

Āmō, kee ekoi kupa. Yvyra ni'a'āi mēe kō vo 'ejē kupa. Āwitō manyvo rā rōmō rōwā ni'ai mēe, āwīvo ve ekoi kupa. Āwitō temitā japy'pōo jimo'yjē remē, soō, omānō jimo'yjē. A'evō ekoi kupa.

¹³ Āmō, āwitō pāranā opipo pipoay remē, yy ryjuikwerà wenōe ity yy reme pē ipi. Isuky katu upa yy reme pē. Āwīvo ve poromo'e rā'āga mēe kō waiwererā omojisaoka janeupe ipi.

Āmō, āwitō jaytata wata mēe kō oo ojisyry syry okājā pātōmimi pē remē, āwīvo ve ekoi kupa. Ajawyi Janejare'e omokājā kōtā imono, pātōmimi e'ete vo mēe pupe. A'e pē Janejare'e oinōma ena rā kō, awyje toiko kupa.

^d 1.9 Tan. 10.13,21; 12.1; J.Jim. 12.7; T.M. 34.6; Sak. 3.2 ^e 1.11 Janejare'e noerovijai maekwerà tē Kāi, omōmiri vo rōwā. Ajawyi ojimōarō omōmiri rē ijuka. Jinō. 4.3-8

^f 1.11 P.Moirō. 22.1-35 ^g 1.11 Tāmō Moisesi rē ojimoāpā. Āwisō Moisesi Janejare'e remipyteporokwerà tesō ipe mijā. Ajamā'ē a'e rē tē tesō ojimoāpā. P.Moirō. 16.1-35

^h 1.12 Jesu koty rewarà kō ojimoaty Janejare'e moe'ea rōmō remē, ojeeve ojimi'u kupa ipi. J.K.R. 2.46; 20.7; 1Kor. 11.20-22

¹⁴A'evotà mǎe rǎ kō rewarà tǎmō Atāo jeapyrerà mō omojenu amǎtejē karamoe remē, Janejare'e kasia rupi. A'e tǎmō Enoki eu ijupe mǎ'ē.ⁱ A'e omojenu amǎtejē. Atāo 7 rōmō ojeapy apy remē pe'ī, Enoki ekoi. A'e tē omojenu amǎtejē nivoi mǎe rǎ kō momorijaua rǎ. Kee e'i imojenu: “Ejapyaka rǎ'ī si! Janerōvijǎ ywete uutà okasia revejē! Emīgwai yvapewarà kō uutà upi. Aty wasu rōmō tesō emīgwai kō ekoi. Nijamoirō irōma kuwa'āi upi uutà mǎe kō. ¹⁵Janerōvijǎ ywete uutà poromosǎ'āga. A'e nivoi mǎe kō pirujē wemavotà ity oo eko aiwererà kō rewarà mō. Janejare'e rē omovyvyrai ywe'e tite kupa rewarà mō a'evo wereko kōtǎ”, e'i imojenu amǎtejē maekwerà.

¹⁶A'evo ywete mijē poromo'e rǎ'āga mǎe kō, pepytery pē ekoi mǎe kō. A'e kō ojimōarō teāmā iko kupa. Janejare'e rē omovyvyrai ywe'e tite kupa ipi. Wemimota ai rupi ekoi ywe'e tite kupa ipi. Ojimo'e'eoaka rǎ'āga jane kō pē kupa ipi. “Aje ipō” e'i tite jane kō āmē. Omoripe kō tē kupa. A'evo Janejare'e ayvu rē poromo'e rǎ'āga mǎe kō ekoi ipi. [Ajawyi tapejimoripeoka ywe'e tite e'ā apijarerà kō pē, a'e pejē.]

Poromotekokuwaa

¹⁷Ajawyi kee a'e pejē, ejimorypa kō. [Poromo'e rǎ'āga mǎe kō rekoa rupi ikō tapeiko ywe'e tite e'ā nē, a'e pejē.] Janerōvijǎ Jesu Kiristu remimonokwerà kō e'i maekwerà rē tapeja'a jē. ¹⁸Kee e'i pejē maekwerà rē tapeja'a jē: “Yvy opatǎ pyri'ī remē, ke'ī Jesu Kiristu ovāe mijē remē, uvetà mirǎ kō, Jesu Kiristu koty rewarà kō oojaità mǎe kō. Noerovijai mǎe kō tē a'e kō. Wemimota ai rupi ekoitǎ kupa”, e'i amǎtejē pemotekokuwaa rōmō maekwerà.^j

Aepo jaa rē tapeja'a jē peiko ipi. ¹⁹A'evo mǎe kō oike sikaepo Jesu koty rewarà kō pytery pē poromojimōarōoka tesō, āwisō tojimoe'y e'yi ojiwyi kupa. Ojevo jē rōwā omojipy'amogetaoka kōtǎ kupa ky'y. A'evo ekoi mǎe kō wemimota ai kō rē tē oja'a ipi. Upi ekoi kupa ipi. Janejare'e 'Āg rōwā omotekokuwa kō. Ovote ojimotekokuwa rǎ'āga kupa ky'y.

²⁰Ajawyi kee a'e pejē, ejimorypa kō. Tapejimokasiay ikō Jesu Kiristu rē pejirovija jē nē. Aje ywete ijayvu mǎ'ē tē Jesu Kiristu ipi. Temirovija tē ijayvu. Ajawyi tapejirovija jē ee, a'e pejē. I'Āg ikō tapemotekokuwa okasia rupi peporegeta Janejare'e pē remē nē. ²¹Janejare'e penauvay. A'e rē tapeja'a jē peiko ipi. Kāramō Janerōvijǎ Jesu Kiristu janereraatǎ okoty, opyri tijaiko karuaru ky'y. Janeporijauesa wyi tē a'evo janererekotǎ. A'evoa rǎ rē tapeja'a jē imoa'u peiko.

²²Jesu koty rewarà kō mō sō nojirovija ywe'ei sikaepo ee remē, tapeporijauesa kō jē āmē. Tapeau kō jē ipi. “Aje pōkō mijǎ?” e'i sō kupa remē, tapeaka kō e'ā āmē. ²³Tapemokasi kō ipijarī kō imomorijaua rǎ

ⁱ 1.14 Jinō. 5.18,21-24 ^j 1.18 2Pe. 3.3

wyi. Āwitō tata pè o'a mǎě japijarĩ kuise'ēay tokai e'ā, āwīvo ve nojirovija ywe'ei ee mǎe kō tijareko katu kō.

Āmō kō nivoi ekoi mǎe kō ve tijaporijauesa jē, “Erory wyi tē agyvo ije”, e'i tite mǎe kō. Āwitō kamisa iky'a remē, manyvo nijareko'āi imoje'o iwyi mǎě vo sō tite eko aiwerà kō. A'evo kamisa jamomo imono. “Temoky'a e'ā!” ja'e imomo. Ijarà nijamomoi ajamǎě. Japorijauesa jē. Kamisa pyaukwerà jame'ē ijupe topypy. Āwīvo ve nivoi ekoi mǎě japorijauesa jē. Ajamǎě eko aiwerà jaityoka ijupe.

Kareta awyjepatà remēwarà

²⁴Ikasiay wete Janejare'e Janerōvijā ywete rōmō. Nojityoka'āi janeupe. Janereraatà okoty. Naikoi 'ete janeaiwererà janere mǎe kō rōmō janereraatà okoty. Āmē sōsi janeroryvaytā ipyri jaiko. Owa katu jaikotà āmē. Nijanemārā'āi ipyri ky'y. ²⁵Ajawyi a'evoa rā rē simoe'e amātejē jaiko! Jesu Kiristu rē jajirovija Janerōvijā ywete rōmō ipi. Ajawyi emīgwai kō rōmō simoe'etā Janejare'e ipi. Kee ja'etā:

Ene rōmō'īte Janejare'e rōmō neiko! Nuvei 'ete nevo mǎě! Ene rōmō'īte neiko!

Orerereko katuarà rōmō ene neiko!

Ene ywesō nekatuay wete orerōvijā wasu rōmō neiko!

Ene ywesō nekasiay wete oreupe neiko!

Ene ywesō neayvukasiay Jōvijā wasu rōmō neiko!

Āwitō yvy jinō e'āve temimoe'e rōmō neiko, āwīvo jē age'e remē neiko! ja'e imoe'e.

Ō'ō, awyje katu āwīvo jamoe'e karuaru jaiko ipi.

[Awyjepa eremikusiwarerà ky'y.]